



KOMUNIKADO PA PRENSA

Fecha

9 di desèmber 2013

Account Manager

Jhanirha Anita

Email

jhanirha.anita@gobiernu.cw

Nr.

MINISTER BALBORDA TA HASI INISIO DI SEMINARIO TOKANTE BENEFISIONAN SOSIAL I EKONÓMIKO DI SERVISIONAN METEOROLÓGIKO

Willemstad – Minister Balborda di Ministerio di Tráfiko, Transporte i Planifikashon Urbano a hasi inisio awe mainta di e seminario tokante benefisionan sosial i ekonómiko di servisionan meteorológiko. Organisashon Mundial di Meteorologia (OMM) a organisá e seminario aki huntu ku Servisio Meteorológiko di Kòrsou.

Durante di e seminario, hefenan di servisionan meteorológiko di nos region ta bini huntu ku representante di OMM pa diskutí riba e tópiko relashoná ku e benefisionan sosio ekonómiko di e servisionan ku nan ta duna. E seminario aki tin komo meta pa 1) analisá e balor ekonómiko ku uso di dato i informashon meteorológiko por tin, 2) interkambiá di eksperensia, i 3) promové un plan di implementashon pa kuantifiká e balor ekonómiko di servisionan meteorológiko.

E seminario aki, ku ta wòrdu dirigí pa dos eksperto internashonal den ekonomia mundial, ta kontinuá durante henter e siman aki na Renaissance Resort i ta un momentu kaminda ekspertonan riba e tereno ta sera konosí ku nos isla i e trabounan ku ta tuma lugá akinan.

Mirando e importansia di e tópiko aki, OMM i e Agensia pa Desaroyo Internashonal Merikano (USAID) ta kubri e gastu di e seminario regional aki. Resultado di e seminario aki ta di uso nashonal, pa loke ta balorashon di servisionan ku ta wòrdu duna pa Servisio Meteorológiko Kòrsou, pero tambe pa otro servisionan meteorológiko den region.

Servisio Meteorológiko, mihó konosí komo Meteo Kòrsou, ta sentro di dato i konosementu pa loke ta Meteorologia, Sismologia i Klimatologia. Tareanan prinsipal di e organisashon ta: 1) kolekta i prosesá datonan meteorológiko, sísmiko i tambe klimatológiko, i 2) emití boletín pa loke ta estado di tempu riba Kòrsou su awanan teritorial i espasio aéreo. Esaki ta pa públiko en general, e sektor di aviashon i tambe sektor marítimo.

Servisio Meteorológiko di Kòrsou ta forma parti di Ministerio di Tráfiko, Transporte i Planifikashon Urbano i ta kai bou di responsabilidat di Minister Balborda. Pueblo di Kòrsou por sigui tur e último desaroyonan di Minister Balborda di Tráfiko, Transporte i Planifikashon Urbano via di su página di facebook 'Earl W. Balborda, Minister VVRP'.